




PAUL FLORA: AUF IN DEN KAMPF – CARTOONS, EDIZIUN DTV 1972

Prezià signur Trump

DA SABRINA BUNDI

■ **Jau vuless gugent offrir a Vus in praticum sin la redacziun da La Quotidiana (sa chapescha be sche Martin Cabalzar fiss d'accord (Martin: quai pudess esser lucrativ). Uschia emprendais Vus che schurnalissem, cunzunt il regional, n'è betg fake.** Cun bloc e rispli giessas Vus per exempel a Surgonda per rapportar sur da la fusìun. Duai Surgonda «maridar» Saluorn, ubain tutina Stiglins? Per la populaziun da Surgonda sco er per numerusas autras vischnancas en la medema situaziun èsi impurtant che Vus rapportias correct, independent e critic. Ils abitants da Surgonda, quels che n'han forsea betg pudì ir a la radunanza da vischnanca ubain n'en anc betg segirs tge votar, dovran infurmazions, naging fake. Ed ils convischins dad autras vischnancas vulan savair co che Surgonda piglia a mauns la fusìun, pli baud u pli tard ston els (forse) er fusiunar. E lura, signur Trump, stat l'auter di Voss artitgel en la gasetta. Ed er sche be paucs legian La Quotidiana en cumparegliaziun cun Voss account da twitter,

sche è forsea tranter quels paucs gist ina tatta che taglia cun premura or Voss artitgel or da la gasetta per mussar el a las collegas da troccas perquai che ses biadi vegn avant lien. Vulais Vus trumpar questa tatta cun fake? Eba. Nus schurnalists prendain serius nossa professiun sco mintga auter lavurant er. Nus avain da guardar sin la detta a politichers, economs, culturals, Gions e Martins e gea, magari schizunt al cumpogn dal chor, per che la populaziun vegnia infurmada correctamain. Quai è nossa incumbensa principala. Quai mussass *Martin Cabalzar* segiramain gugent a Vus. Paja na dess quai nagina, Vus avais avunda raps e La Quotidiana betg. Dentant forsea che Vus pudessas midar quai: Sche be 1 pertschient da Voss 47 milliuns followers sin twitter cumprass be 1 exemplar da La Quotidiana cun en Voss artitgel da Surgonda, dess quai bunamain 1 milliun francs per La Quotidiana. Prezià signur Trump, jau sai, Vus na vegnis mai a leger mia offerta, ella è numnadamain fake (sorry Martin).

L'autura è schurnalista